

[Augsburg], 11. Juni 1556

An Joachim Camerarius d. Ä.

BSB, Clm 10370, Nr. 261.

Clarissimo viro, D. Ioachimo Camerario etc. Domino et amico suo colendo. Leipzig.  
 S. P. D. Inuitus equidem facio, Clariss[ime] vir, vt tibi sim molestus importuna petitione. ἀλλὰ τί καὶ πάθοι τὶς, εἰ φίλος τὶς ὡν βιάζοιτο; Marquardus Rosenbergius nostri Cypriani iam longo tempore hospes, nullas rationes meas audire voluit, dissuadentis, ne tibi negocium facesseret alioqui occupatissimo, et alio studiorum genere occupato, ac tandem a me extorsit, vt te suo nomine rogarem, ne grauareris tuum iudicium ἀφοριστικῶς atque breuissimè de sua genesi, quam vnā mittit, scribere, ac in primis declarare, quid de ἐπαναφορᾷ τοῦ ὠροσκόπου καὶ τῷ δυτικῷ κέντρῳ sentias, φιλοχρήματος γάρ ἔστι καὶ φιλογυνῆς, καὶ τοῦ πλούτωνός τε καὶ τῆς ἀφροδίτης τῆς χρυσῆς εὑμενοῖν τυχών, τελέως εὐδαιμονήσειν οἴεται. quanquam iam ex patrimonio est ditiss[imus]. Scio multa quae excusaturus es, sed si quid mihi impudentiae concedis, in hoc concedas velim, vt voto egregij iuuenis satisfacias. Pollicetur munusculi aliquid quo labor tuus pensetur, qui eo minus tibi capiendus erit, quod Cyprianus thema cum progressionib[us] omnibus supputatum tibi mittit, cui obsequium tuum multum commodabit apud hospitem, cuius sumptibus opera illius omnia imprimuntur. Ob eamqüe liberalitatem, qua nostri ordinis homines prosequitur, dignus est nostris officijs. Hoc si a te impetraro, etiam eo nomine tibi debebo. Nam vt tabulas Eclipsium et Ephemeridas commendes tuis hominibus, quò facilius autoritate tua et testimonio approbatae distrahanter, orare superuacuum esse puto, cum ex proximis tuis literis quanti eas facias intelleixerim. Breuitas temporis me plura scribere non patitur, nisi quod pergratum erit, si meae importunitati veniam dederis, et Rosenbergio, si res tuae patientur, vnam atque alteram horam ἀνυπευθύνως μαντευόμενος impenderis. Vale. 3 Idus Iunij Anno 1556. Raptim.

Hiero[nymus] W[olfius] T[uus].

Pene exciderat. Idem Rosenbergius rogauit, vbi themate natalitio et progressionum descriptione vsus fueris, vt ea vnā cum tuis literis ad Rhaeticum, si potes, mittas. Nos enim hic, vbi degat, ignoramus, ab eoqüe petas, vt et ipse suum iudicium breuiter perscribat, quem et ipsum Rosenbergius remunerabitur. Literas vltrò citroqüe mittere poteris per hunc eius procuratorem. Sed desino conduplicare impudentiam meam, atque iterum veniam peto, teqüe cum tuis omnibus quam rectiss[ime] valere opto.